

四庫全書

集部

欽定四庫全書

集部

元詩選初集卷六十四

詳校官中書<sub>臣</sub>王鵬

主事銜<sub>臣</sub>徐以坤覆勘

總校官編修<sub>臣</sub>王燕緒

校對官檢討<sub>臣</sub>溫常綬

謄錄監生<sub>臣</sub>萬培成

欽定四庫全書

元詩選初集卷六十四

庶吉士顧嗣立編

玉山主人顧瑛

瑛一名阿瑛別名德輝字仲瑛崑山人世居界

溪之上輕財結客年三十始折節讀書購古書

名畫三代以來彞鼎秘玩集錄鑒賞無虛日舉

茂才署會稽教諭辟行省屬官皆不就年四十

以家產付其子元臣卜築玉山草堂園池亭榭

餽館聲伎之盛甲于天下四方名士若張仲舉  
楊庶夫柯九思李孝光鄭明德倪元鎮方外若  
張伯雨于彥成琦元璞輩常主其家日夜置酒  
賦詩有二妓曰小橘花南枝秀者每遇宴會輒  
命侑觴一時風流文雅著稱東南焉淮張據吳  
避隱嘉興之合溪母喪歸綽溪張氏再避之斷  
髮廬墓繙閱釋典自稱金粟道人至正末元臣  
為水軍副都萬戶恩封武略將軍水軍千戶飛

騎尉錢唐縣男洪武元年以元臣為元故官例  
徙臨濠二年三月卒年六十自為壙志戒其子  
以紵衣桐帽褰韉布襪纏裹入土嘗自題其像  
曰儒衣僧帽道人韉天下青山骨可埋若說向  
時豪俠興五陵鞍馬洛陽街所著有玉山璞藁  
會粹一時高人勝流分題宴集之作為玉山名  
勝集又第其篋笥所藏都為一集曰草堂雅集  
又有玉山餞別寄贈詩及玉山紀游詩則汝陽

袁華所編也李一初曰玉山草堂良辰美景士  
友羣集四方之能為文辭者凡過蘇必之焉歡  
意濃決隨興所至羅尊俎陳硯席列坐分題無  
間賓主仙翁釋子亦往往而在長短雜體靡所  
不有可謂盛矣壬申秋余同犀月訪大臨于界  
溪得上綽墩尋玉山遺址遙望山色湖光而緬  
想當年草堂文酒之會真吾家千載一佳話也

金粟冢中秋日燕集

綽山古佳城左股接昆丘水作青龍來九派盤遭適道  
人金粟冢在彼山之幽團團青桂樹枝葉相蜷膠石削  
華表立碑刻金窠鏤人身無百年胡乃三彭仇四大偶  
一失九丹不能瘳內血遺臭腐不朽唯髑髏棄之道路  
旁行者得溺洩狐狸與蠅蚋食嘍紛相讎欲貽後之人  
以掩面目羞烏兔互出沒急行不入郵縱一作繼有萬丈  
繩誰能繫之留煖穴競螻蟻涼風滅蜉蝣榮名乃何物  
汲汲將奚求金谷珊瑚樹天網一作細一夕收美人化黃

壤燕子巢空樓大印佩六國散金馳八驕一朝不得志  
車裂徇九州秦皇與漢武靈藥採仙洲玉棺葬地底金  
鳧出海陬梨花自寒食夜雨鬼啾啾飛錢化蝴蝶走燐  
驚鵲鷗混沌鑿不死儵忽何能休丈夫不解事老大傷白頭  
何如種秫米壓酒日日籥今夕三五夕我已為君謀長  
瓶置十斛百結青絲兜截江取紫蟹攀樹摘紅榴周垣  
設茵席矮几陳脯修步登白雲屏待月豁醉眸劃然白  
蝦蟇抱出黃金毬又若麾尼珠躍出驪龍湫吐吞大地



影晃漾東南浮老兔玉杵舊擣作人間秋寶城三千里

縮景歸遐搜宮殿魚鱗騫草

一作林

木秋雲稠素娥騎彩

鷺舞雪翻霓裘手折瓊樹花競拂金精流化為五素芒

落我白瑤甌持滿向君語借箸請為籌十載苦國難豪

傑紛戈矛鴻門碎玉斗桃園宰烏牛戰血濺野草餓莩

填荒溝我時別

一作挈

妻孥夜汎苔雪舟有兒握

一作縮

兵

符承乏萬戶侯三年盡

一作效

忠歸身作抱官囚平生萬

卷書怒焚遭鬱攸廬墓讀內典守節事清修親友散如

雪雲樹空悠悠獨爾數君子艱棘見何由今聞王師出  
卒伍皆兜鍪弄刀走官馬千里風颼颼桓桓李將軍大  
旗畫蚩尤去秋奪汴城今復追大酋屯兵泗水上添竈  
扼賊喉東南貢米粟連綱起歌驅我曹幸無恙坐見恢  
皇猷酒旗指南斗今茲會綢繆請起各稱壽我亦相勸  
酌羣才盡敏捷用作釣詩鈎青山忽大笑此意君知不  
呼童酌大白酌此土一坏他時蓋棺了神隨和氣游中  
一作 插空中華撒手鞭蒼蚪東海招若士西池訪阿緄

共看麻姑爪當座壁瑩篴不必兒女淚暗灑  
窀穸愁達哉司空圖吾今乃其傳大書勒崖壁永絕生前遊

玉山主人嘗作生壙自為銘曰嘉樹蔽日涼颺散煙  
展席藉草待月臨川簪蓋既合飲芳割鮮歌斯哭斯  
以終餘年

### 趙仲穆畫看雲圖

青山與浮雲終日淡相守山為雲窟宅雲為山戶牖無  
心成白衣有意變蒼狗人情亦如雲寄語看雲叟

### 巫峽雲濤石屏志

謝家綠玉屏不琢龜甲形方若陟釐紙紛縹帶苔青秀  
潔庚庚絕文理十二巫峯橫隱起芙蓉照影立亭亭遠  
落巴江一江水素湍洶湧翻綠濤長風吹雲白月高三  
峽濤聲滿人耳箇中獨欠孤猿號胡僧漫有金壺汁洒  
向素縑圖不得女媧鍊石作五彩點染料應無此色此  
石產景由天工略假石人磨削功石色欲盡玉色起汎  
沈天碧涵清空君不聞大食貢石瑩如玉山有奇松四  
時綠六月涼風卷翠濤瑟瑟秋聲戰空屋又不聞楊家

古屏刻水精中有為雲之美人海綃衣裳為煙霧姓名  
自語非真真二物化去固已久價重隋珠難再有君家  
玉屏獨在世勿落忍人豪奪手我聞故人楊鐵仙東帶  
拜之如米顛起來發狂捉鐵筆醉墨寫入青瑤鐫何日  
乘舟上魚復喚取巴童唱巴曲更借丹丘粉墨屏對案

巫山真面目

余嘗往震澤聞松陵謝氏伯仲賢而好事而余水仙之舟未得一造其所今高君叔

彬攜此卷至別業求題且知楊鐵崖亦到湖上由是益知其賢而好事故製長詩一篇寄題寶屏他日或飲君  
舊薇花下幸出此為張本云至正乙巳七月  
二十一日金粟道人顧阿瑛書于合溪別業

玉鸞謠

并序

楊廉夫昔有二鐵笛字之曰鐵龍今亡其一偶得蒼玉簫一枚字為玉鸞以配鐵龍廉夫喜甚復以書來索賦玉鸞謠志來自云至正甲午三月既望界溪顧瑛書於柳塘春

七寶城中夜吹笛舞按白鸞三十隻箇中小玉號細腰  
尾拂廣陵秋月白伐毛脫骨秋風裏素頸圓長尺有咫  
中虛一竅混沌通上有連珠七星子羿妻久閉結璘臺

弄玉求之遺簫史調得仙家別鵲聲吹落虎頭金粟耳  
挂園山伯楊鐵翁昔參洞庭雙鐵龍雌龍入海去不返  
雄龍解處瓊林宮宮中夜夜泣寒雨幽咽悲啼作人語  
燃犀莫照玉鏡臺買絲難繫藍橋杵虎頭憐之為媾婚  
并刀翦紙招鸞魂鸞之來兮洞房曉恍然枕席生春溫  
鐵仙翁笑拍手左瓊瓊右柳柳瓊瓊細舞抑抑歌起勸  
虎頭三進酒畫堂龜甲開屏風翠煙凝暖春雲濃大瓶  
酒瀉鸚鵡綠滿頭花插鴛鴦紅鸞兮運居巢龍兮弄橫

竹君山月落大江秋黃姑星殞崑岡玉不須再奏合歡  
辭且聽和鸞太平曲太平曲斷還續一轉一拍相節促  
諧宮協徵宣八風寒谷能令生五穀鸞龍臺上鳳皇來  
萬歲八音調玉燭

花游曲同張貞居游石湖和楊庶夫韻

真娘墓下花溟濛碧梢小鳥啼春風蘭舟搖搖落花裏  
唱徹吳歌弄吳水十三女子楊柳門青絲盤髻鬱金裙  
折花賣眼一回步蛺蝶雙飛上春墓老仙醉弄鐵笛來



璫花起作回風杯興酣鯨吸瑪瑙椀立按鳴箏促象板  
午光小落行春西碧桃花下題新題西家忽遣青鳥使  
致書殷勤招再四當筵奪得鳳頭牋大寫仙人蹋鞠篇

樓雲軒

春雲壓簾飛不起暖氣龍蔥百餘里桃花亭亭笑酣春  
谿邊浣花染谿水武陵才人碧窗底青霓衣裳白霞裏  
翠煙點染猩猩毛冰綃凝文露華洗山光入眼青青迷  
小鳥向人啼復啼前村後村樹如蓋柳花起舞迴風低

雲師雨師浩無據驅雲勞勞向何處請君勸師一杯酒  
更借白雲檐下住

雪夜泊楓橋

江城殘雪裏人發剡溪舟花急風翻去潮生水逆流傷  
心憐去鴈幽興託盟鷗寄語東家叟春山擬共游

寫柏子庭卷

虛舟元不繫湖海至今稱悟得庭前柏方為物外僧空  
空無我相落著有誰應肯向東山住東山氣倍增

和韻二首

喔喔雞鳴桑樹顛  
江村風景只依然  
人行紅葉黃花裏  
鴈過西風落日邊  
南市津頭無酒旆  
東湖渡口有魚船  
北山巖壑秋偏靜  
借看蒲團枕石眠

夏潮平沒白鷗沙  
船舫風生起浪花  
為向船頭置美酒  
恰如天上汎浮槎  
銀盤雪落千絲鱠  
玉手冰分五色瓜  
明日山中看疎雨  
共將詩句寄丹霞

次韻送吳國良

桐軒隱者重相訪草閣能留十日歸快雪半消春水闊  
扁舟又逐白鷗飛似聞迂叟耕梅里每過山家款竹扉  
期子幾時來慰我共披鶴氅坐漁磯

海洲夜景

三沙宛在海當中隱見珊瑚樹色紅神島由來連弱水  
樓船欲去引剛風東方日出鮫人國半夜潮生織女宮  
却憶題詩繡衣使高秋會過玉山東

題宋徽宗仙山樓觀圖

宣和天子昔神游鳳駕行空過玉樓此去有人言赤馬  
歸來無處逐青牛分明艮岳通玄圃想像方壺接祖洲  
莫把仙山作圖畫瓊花琪樹不勝秋

天寶宮詞十二首寓感

草堂雅集本作唐宮詞次  
鐵雅先生無題韻十首

天寶雞坊寵賈昌不教

一作  
宮中

蝴蝶上

一作  
滿

釵梁錦裯畫

浴天驕子絳節朝看王大娘

王母也

芍藥金闌開內苑蒲

萄玉觥酌西涼月支十萬資脂粉獨有三娥

一作  
媛

素面

妝

五家第宅近天家，侍女都封繫臂紗。  
池上桃開銷恨樹，閣中香進助情花。  
風迴輦道齋鈴遠，日射龍顏雉扇斜。  
韓虢並騎官廐馬，醉攬丞相踏堤沙。

此首與第九首  
草堂雅集不載

蓮花池畔暑風涼，玉竹迴文寶簾光。  
貪倚畫屏調一作看

翡翠，誤開金鎖放鴛鴦。  
輕綃披霧誇新浴，墮髻敲雲銜  
晚妝笑語女牛私語處，長生殿下月中央。

五色鄉雲護帝城，春風無處不關情。  
小花靜院偷吹笛，淡月閒房背合箏。  
鳳爪劈柑封細合，龍頭瀉酒下瑤罌。  
後宮

學做金錢會香水蘭盆浴化生

龍旂翠

一作孔

蓋擁鸞幢步輦追隨幸曲江鳥道正通天

上路羊車直到竹間窗桃花柳葉元無匹

一作限

燕子鶯

兒各有雙中貴向人言近事風流陣裏帝先降

秘閣香殘日影移燈分青玉刻蟠螭琵琶鳳結紅文木

絃索蠶繅綠水絲金屋有花頻賭酒玉杵無子不彈碁

傳宣趣發明馳使南海今年進荔枝

近臣諧謔侶枚皋侍宴承恩得錦袍扇賜方空描蛺蝶

局看雙陸賭櫻桃翰林醉進清平調光祿新呈玉

一作五

色醪密奏君王好將息昨朝馬上打圍勞

號國來朝不動塵障泥一色繡麒麟朱衣小隊高呵道  
粉筆新圖徧寫真寶雀玉蟬簪翠髻銀鵲金鳳踏文茵  
一從羯鼓催春後不信司花別有神

十三女子擘箜篌選作梨園第一流却道荷花真解語  
豈知萱草本忘憂紅鸞不照深宮命翠鳳常看破鏡羞  
舞得太平并萬歲五年誰賜錦纏頭



五王馬上打毬歸贏得宮花獻貴妃樂起閤門邊奏少  
禍因臺寺諫書稀侍兒隨幸皆頒紫骰子蒙恩亦賜緋

娣

一作姊

妹相從習歌舞何人能製柘黃衣

新製霓裳按舞腰笑他飛燕怕風飄玉蠶一作簪倒卧蟠

條脫金鳳斜飛上步搖雲母屏開

一作殿前

齊奏樂沈香火

底並

一作坐

吹簫只因野鹿銜花去從此君王罷早朝

宮衣窄窄小黃門躑躅初開賜縹盆夜月不窺鸚鵡塚  
春風每憶鳳皇園愛收花露消心渴怕解金珂見爪痕

只有椒房老宮監白頭一一話開元

鐵雅評曰十詩綿聯緜麗消得錦半

也臂

次韻劉季章治中邀夏仲信郎中游永安湖

湖上筵開張水戲卷幔涼風吹短蒲大魚聽樂浪頭出  
小艇賣花城內無丙鼎庚庚識饕餮甲煎斑斑炙鷓鴣  
酒酣賦詩動海色親紙楷書能寄吾

次韻觀帖之什

水如燕尾出湖分合入長溪直

一作且

到門韋杜桑麻元

兩曲朱陳鷄犬却通村  
換羊賣馬囊中帖剗瘳縣匏竹  
裏尊昨日煩君來閱賞  
扁舟短纜繫籬根

次韻癸卯除夕

仰觀北斗轉遙天  
春在寒爐爆竹邊  
夜列粉盤循舊俗  
曉看羅帕賀新年  
燒餘葶蔕生當路  
雪後梅花開滿煙  
不用鞭灰覓如願  
客囊剩有酒家錢

夜宿三塔次陳元朗韻

水落南湖不露沙  
又牽舫子到僧家  
春浮大斗娟娟酒

寒隔虛櫺薄薄紗半夜塔

一作  
檐

鈴傳梵語一林江月照

梅花坐來詩句生枯叻指點銀瓶索煮茶

武島上梅花

微波蕩漾鏡中天瑤樹春迴玉蘂聯苔雨青青空落月  
岩雲漠漠不成煙臨風宛睹緱山侶照影疑逢洛浦仙  
王母欲來青鳥至暗香如水夜如年

趙子期尚書于省幕創軒曰小瀛洲題詩要余與

明德同賦

鳳皇池上神仙宅五色卿雲接帝家金水暖通蓬島浪  
紫薇香度掖垣花中天草木春霑澤滄海星辰夜挂槎  
聞道朝堂清議了題詩好為護蟬紗

寄鄭明德

我愛塵居鄭有道屢辭徵幣卧松雲年來短綬籠紗帽  
客至新詩寫練裙几上只留招隱賦人前每讀送窮文  
清時已見文名盛日日高車訪隱君

游天平題文正公詞

魏公勲業垂前代百世高風道並隆立廟東吳見遺像  
出師西夏有全功山迴鳥道千盤盡天入龍門一罅通  
赫赫皇朝昭祀典蒸蒸嘗亦與武侯同

寄楊鐵崖

錦衣坊口揚雄宅飲馬河邊潁水波風信東來春事早  
湖光回去夕陽多館娃隔水啼鶯燕弟子填門列鳳鸞  
無那老狂狂更甚劒簫猶倚小紅歌

戲荅陸靜遠

秋水藍橋一尺強，愁聞玉杵擣玄霜。  
東籬老子烏紗薄，西郭佳人翠袖長。  
古寺竹深禪榻靜，晴窗花落硯池香。  
西風鶴背三更夢，笑看瑤花作醉鄉。

堯文文學過訪賦別兼簡鶴齋薛真人

名毅夫

二首

草堂五日少人過，門巷春泥柰雨何。  
滿樹枇杷鶯竊盡，一堦芳草蟻行多。  
因思諸葛吟梁父，却笑蘇秦漫揣摩。  
老我衰年無白髮，從今也合號涪皤。

憶昨相過寂寞濱，白頭傾蓋豈如新。  
驚回赤壁三更夢，

開遍

一作畫

桃花一樹

一作度

春顧我老為思  
樞馬憐君遠

作倚

一作賦

樓人黃公壚畔  
三株樹留待來  
時醉挂巾

虎丘十詠

千頃雲

觸石起膚寸悠然散千頃  
我來坐東軒妙趣心獨領

小吳軒

雪沒羣山盡天垂落日縣  
馮虛俯城郭隱見一絲煙

劍池



地坼重淵積人亡寶劍藏千年斷崖月何處照龍光

試劍石

劍試一痕秋崖傾水斷流如何百年後不斬趙高頭

五臺山

海湧如來室清涼即五臺春風山頂雪飛度鴈門來

生公臺

生公聚白石塵拂天花墜可憐塵中人不解點頭意

塔影

塔倚高標立樓深一竅虛海風吹幻影顛倒落方諸  
致爽閣

高閣對西山飛嵐落几間開襟致秋爽心與白雲閒  
真娘墓

何處真娘墓雲埋斷石根夜深風雨急誰喚海棠魂  
陸羽井

雪霽春泉碧苔侵石甃青如何陸鴻漸不入品茶經  
題吳性存所藏趙仲穆竹枝雙螭圖

閣道春風度湘簾夜月初多情雙蛺蝶也解逐羊車

趙仲穆臨李伯時鳳頭驄

君王不愛碧銜霞獨愛真龍被紫花珍重王孫親貌得  
錦中袂送野人家

房山畫

渴龍飲海海水寬鐵網下截珊瑚寒道人醉卧叫寒玉  
金粉亂落松花壇

補之竹卷

碧眼胡兒叫橫玉落日如盆照茅屋美人清夢斷梅花  
却寫相思在修竹

張仲舉待制以京口海上口號見寄瑛以吳下時  
事答之五首

白晝驚風海上號水軍三萬盡乘濤書生不解參軍事  
也向船頭著戰袍

冉冉長蛇漢水東噓成黑霧滿虛空腥風怪雨重陰底  
化作黃虬不是龍

莫辨黃鐘瓦缶聲且攜斗酒聽春鶯河西金盞新翻譜  
漢語夸音唱滿城

紅綠油牌去復來長身碧眼更頽顙口傳催辦軍需事  
一日能無一百迴

和糴糧船去若飛兼春帶夏未曾歸用錢贈米該加七  
納戶身縣百結衣

乙未和孟天暉都司見寄五首

江頭日日惜芳時三月春光兩鬢絲拔劍自歌還自舞

邑人誰識虎頭癡

治安無策濟時艱始信金銷壯士顏怪底颺風翻漲海  
浪頭一直過狼山

獵獵東風吹火旗水軍三萬盡精肥一春殺賊知多少  
箇箇身穿濺血衣

婁上人家不識春簷頭蛛網亦生塵朱門桃李皆零落  
只有東風未嫁人

聞道君王自早參每虛前席問江南何人醫手如秦緩

有客能碁似李慙

題趙子昂畫楚江春曉

東方旭日出曛曠照見巴江曲  
似弓莫遣猿聲到巫峽  
山頭猶有楚王宮

往鳳陽次虎丘

柳條折盡尚東風  
杼柚人家戶戶空  
祇有虎丘山色好  
不堪又在客愁中

題文湖州竹

湖州昔在湖州日日逢人寫竹枝一段枯梢作三折  
分明雪後上窗時

西湖竹枝詞二首

素雲缺月挂秋河聽得臨風白苧歌湖水西來流不斷海  
潮東去是風波

陌上採桑桑葉稀家中看蠶怕蠶饑大姑要織回文錦

小姑要織嫁時衣

二詩見鐵崖西湖竹枝唱和序云琪  
才性高曠尤善小李詩及今樂府海

內文士樂與之交  
推為片玉山人云



新安梅和張師夔

寶地生春玉氣新  
苔煙如霧翠光勻  
山僧分得維摩供  
三素雲中別有春

謝靜遠惠紙

蜀郡金花新著樣  
剡溪玉板舊齊名  
荷君寄我黔川雪  
猶帶連漪瀉月聲

謝靜遠惠蜜梅

江南煙雨未全黃  
誰使青酸墮蜜房  
斌婚已知魏證

典刑時復見中郎

玉山草堂口占

臨池醉吸杯中月  
隔屋香傳藥上花  
狂煞會稽于外史  
秋風吹墮小烏紗

揚鐵崖玉山記云崑隱君顧仲瑛氏其家世在崑之西界溪之上既與其仲為東西第又稍為園池別墅治屋廬其中名其前之軒曰釣月中之室曰芝雲東曰可詩齋西曰讀書舍後累石為山山前之亭曰種玉登山而憩住者小蓮菜山邊之樓曰小游仙最後之堂曰碧梧翠竹又有湖光山色之樓過浣花之溪而草堂在焉所謂柳塘春漁莊者又其東偏之景也臨池之軒曰金粟影此虎頭之癡絕者合而稱之則

曰玉山佳處也按名勝集尚有書畫舫春暉樓秋華亭淡香亭君子亭雪巢春草池綠波亭絳雪亭聽雪齋白雲海來龜軒拜石壇寒翠所等處記中不載楊循吉蘇談云顧阿瑛在元末為崑山大家亭館有三十六處鐵崖共詠云三十六橋明月夜姑蘇城裏有瓊花即此謂也今合記中與名勝集所載止有二十八處餘皆不可攷矣

玉山佳處以愛汝玉山草堂靜分韻得靜字

蘭風蕩叢薄高宇日色靜林迴泛春聲簾疎散清影褰  
裳石蘿古濯纓水花冷於馬奉華觴聊以娛晝永

次韻永嘉曹新民玉山席上作

詩人得句題茅屋客子乘流泛小舸老眼看花起春霧  
醉眠聽雨響秋濤弓盤舞按銀鷺隊水調聲傳金鳳槽  
與爾共傾千日酒呼童換却五雲袍

以炯如流水涵青蘋分韻得流字

附龍門山釋良琦元璞序云去

年夏六月十八日余與延陵吳伯恭雲臺散吏  
郊九成訪玉山草堂主人留半月酣飲賦詩無  
虛日當時以為人生歡會之難未知明年又在  
何處慨然為之興哀今年五月中幹復與延陵  
吳水西隴西李立放舟溪上迂疎散逸其樂又  
過于前所寓者及視舊所題詩章則伯恭在數  
百里外雲臺方進漕掾日趨大府以簿書從事  
得周旋相與談笑者巨廬山人在焉飲散步月

以炯如流水涵青蘋分韻賦詩如左書之于卷  
以示今之所寓者如此而後之所寓者不知其

可必不可必也時至正庚寅五月十八日具龍門山良琦書

幽人雅愛玉山好肯作清酣竟日留梧竹一庭涼欲雨

池臺五月氣涵秋月中獨鶴如人立花外疎螢入幔流

莫笑虎頭癡絕甚題詩直欲擬湯休

以冰衡玉壺縣秋分韻得壺字  
附遂昌鄭元祐明德序云至正十年

龍集庚寅秋七月二十有一日吳中僧宣無言訪顧仲瑛于玉山時遂昌鄭元祐先在馬匡廬于立彥成則仲瑛之客也款之春暉樓上行酒對奕已而觴詠于芝雲堂酒半興洽分冰衡玉

欽定四庫全書

卷六十四

壺懸清秋為韻相與賦詩以紀一時邂逅之樂  
仲瑛得壺字詩先成莒城趙善長作畫以代詩

坐客不能成詩

者各罰酒一觥

鄭玄于鵠本清好況有名僧似仲殊濠上魚肥應受釣  
厨中酒熟莫教酤雨花落座成金粟秋露凝寒貯玉壺  
更向飛樓賭碁樂香囊留得未全輸

以丹桂五枝芳分韻得五字

附匡廬于立彥成序  
云七月二十五日金

華王子充過玉山夜飲芝雲堂上酒酣賦詩以  
丹桂五枝芳為韻余得丹字蓋子充黃太史里  
人又其高第門生也挾所學由京師來就鄉試  
于南省汴銀河攀月桂且有日故余詩多歸美

之是日約琦元璞索子英不至明  
日二公來遂足韻寫詩次第于後

南州孟秋月維日二十五迴風吹層霄飛雲過疎雨客  
從金華來款曲置樽俎況有匡廬仙貌古心亦古襟期  
事蕭散笑傲忘賓主哀絃發秦聲修肴善胡舞秋輝能  
娛人夜色滿庭戶脩脩風葉鳴泫泫露花吐春波杯中  
月不照墳上土緬裒琦龍門扁舟下南浦

以玉山亭館分題得金粟影

附晉寧張翥仲舉序云至正十年蒼龍庚

寅之歲秋仲十九日余以代祀歸至姑蘇顧君仲瑛延于玉山時鄭君明德李君廷鉉于君彥

欽定四庫全書

元詩選初集

卷六十四

方外友本元

成刻君九成華君佐芳華  
元璩二公酒半歡甚即席以玉山亭館分題者

九人予以過賓屬小引未知昔  
賢梓澤蘭亭如今之會也耶

飛軒下瞰芙蓉渚檻外幽花月中吐天風寂寂吹古香  
清露泠泠溼秋圃雲梯萬丈手可攀居然夢落清虛府  
庭中擣藥玉兔愁樹下垂鸞素娥舞瓊樓玉殿千娉婷  
中有癯仙淡眉宇問我西湖舊風月何似東華軟塵土寒  
光倒落影娥池的皪明珠承翠羽但見山河影動搖獨  
有清輝照今古覺來作詩思茫然金粟霏霏下如雨



以夜闌更秉燭相對如夢寐分韻得夢字

附弋陽山燕李

續序云至正十一年冬十月二十三日玉山隱君宴其客王德輔胡伯明袁子英李續酒酣忽剡雲臺陸良貴泛舸而來隱君復呼酒盡歡匡廬先生以夜闌更秉燭相對如夢寐分韻賦詩時坐客止八人遂虛二韻夫人生百年憂患之秋多燕樂之日少而況友朋南北東西迄無定居則今日之簪盞夫豈偶然哉弋陽山燕李續謹啟

涼風振林木惻惻初寒動肅客  
桃花源張筵鳴玉洞落日照金樽  
飛雪栖畫棟談玄味妙理謔笑雜微諷  
取琴雪巢彈共聽金石弄嘉會固難并  
聚散恍春夢明發大

江舟天濶孤鴻送

釣月軒分題

并序

至正十年七月初五日琦龍門過玉山留數日將  
泛蘭陵之舟而未果十二日起文高先生雨中見  
過復留周旋是日飲酒釣月軒中秋暑乍退雨止  
復作龍門琦以舊雨不來今雨來分題余得舊字  
秋暑困人如中酒涼雨淒風忽相逗堦下決明花正鮮  
池上芙蓉香欲瘦山人欲歸不得歸西夏郎官却相候

當軒不復問寒溫羣口誇詩如健鬪秋娘起拂紅綃袖  
素壁看題今已舊舊雨不來今雨來故交那在新交右  
坐聽飛溜落虛簷似與冰絃聲合奏清歡聊欲紀文字  
長席還當陳俎豆人生有酒不為樂何異飛蚊聚昏晝  
玉山醉倒嵇叔夜紫芝光浮元德秀君今此行良不苟  
請君一觴為君壽風簾官燭暗秋屏歸期已在黃昏後

芝雲堂以風林纖月落分韻得纖字

附于彥成序  
云至正十年

七月六日吳水西琦龍門偕隴西李雲山乘潮  
下吳江遊界溪詩來道問訊玉山主人命騎追

還草堂晚酌芝雲露氣已下微月已在林樹間  
酒半快甚欲賦詠紀興以風林纖月落分韻拈  
題惟李雲山狂歌清嘯不能成章  
罰三大觥逃去是日詩成者三人

空堂清飲夜厭厭坐久情深酒屢添龍氣當天河鼓溼  
翠痕浮樹月鉤纖梧桐葉落鳴金井絡緯聲多近繡簾  
我欲分題紀良集詩成還慰老夫潛

至正十年秋七月十有三日起丈高先生自姑蘇  
汎舟攜酒轂過玉山會飲芝雲堂上座客于匡  
山琦龍門相與談詩疊疊不絕酒半龍門分藍

田日暖玉生煙為韻余探得藍字坐無長幼能  
詩者咸賦焉

高堂政在玉山南竹色梧陰積翠嵐秀結紫芝雲作蓋  
先生珠樹玉如藍每勞飛鳥花間使時有翔鸞月下驂  
客至酒尊聊劇飲僧來麈尾聽清談行杯長待纖歌發  
分韻還將險字探佛印固知元九九文殊何必說三三  
莫忘石上三生約且盡山中十日酣當檻荷開香屢度  
隔牀花落雨同甃鹿門何處真成隱雞舌他年自可舍

送別江亭

一作頭

折楊柳西風應愧雪盈簷

余與楊君鐵崖別兩年矣庚寅嘉平之朔君自松

泖過余溪上適永嘉曹新民自武林至相與飲

酒芝雲堂明日鐵崖將赴任曹君亦有茂異之

舉同往武林信歡會之甚難而分攜之獨易安

可不痛飲盡興以洗此憤憤之衷因以對酒當

歌為韻賦詩如左于匡廬屬瑛序數語為識

江空暮雲合歲晚雪霰多佳人美無度嚴裝徑相過夜

宴芝雲館明發玉山阿繁聲落虛溜急袖翻迴波客有  
子曹子調笑春風歌歌終易離別別去愁蹉跎相思梅  
花發不飲當如何

是日秦淮海泛舟過淖湖向夕未歸余與桂天香  
坐芝雲堂以佇之堂陰枇杷始華爛炯如雪乃  
移桃笙樹底據磐石相與奕碁遂勝其紫絲囊  
而罷于是小蟠桃執文犀觥起賀金縷衣軋鳳  
頭琴余亦擘古阮唯

子雖切撮口也

酒甚歡而天香鬱

鬱有潛然之態俄而淮海歸且示以舟中所詠  
余用韻并紀其事云

王子岡頭秋杳冥石牀摘阮素琴停枇杷花開如雪白  
楊柳葉落帶煙青每聞投壺笑玉女不堪鼓瑟怨湘靈  
酒闌秉燭坐深夜細雨小寒生翠屏

可詩齋以客從遠方來遣我雙鯉魚平聲字分韻得

方字

附汝陽素華子英序云至正乙未秋九月  
平江等處水軍都萬戶納琳哈喇公拜江

湖行省參知政事奉旨統兵常鎮時寧海所正  
千戶顧元臣在行間越明年二月寧海君由無



錫道太湖入抗維時姑蘇攜李之壤香如其越  
音問不相知者二載今年春二月寧海君以功  
陞水軍都府副都萬戶奉省檄道天台抗海而  
歸時秋閏九月也玉山嘉子之歸乃置酒會友  
朋于可詩齋寧海君絳衣金符照耀左右奉觴  
行酒侃侃愉愉嗚呼父子之親君臣之義鮮有  
能兩全者今寧海君能摠誠致義陞秩三品居  
重慶之下奉溫清之養可謂上不負聖天子下  
不負所學矣座客皆能賦者遂以客從遠方來  
遺我雙鯉魚以平聲循次分韻予得從字敬序  
其端玉山翁名璵字仲璵余則汝  
陽素華今年為至正十七年云爾

海上風飄似馬狂歸來仍喜佩銀章三年報國存忠直一  
旦見親全義方祖述誓江期復晉董徽仗節樂還鄉聖

恩已見金雞放醉飲寧辭累十觴

海虞山人繆叔正扁舟相過以慰別後之思余謂  
兵後朋舊星散得一頃相見曠如隔世遂邀汝  
陽袁子英天平范君本彭城錢好學榮城趙善  
長扶風馬孟昭聚首可詩齋內諸公亦樂就飲  
或攜肴或挈果共成真率之會由是皆盡歡飲  
酒酣各賦詩以紀走筆而就興有未盡者復能  
酬倡以樂永夜余以詩先成叔正俾余叙數語

于篇首緬思烽火隔江近在百里今夕之會誠  
不易得況後會無期乎吳宮花草婁江風月今  
皆走麋鹿于瓦礫場矣獨吾草堂宛在溪上余  
雖祝髮尚能與諸公觴詠其下共忘此身于干  
戈之世豈非夢游于已公之茅屋乎善長秉筆  
作圖于卷余索孟昭楷書以識時丙申歲己亥  
月乙亥日齋之主人顧瑛序而復賦詩曰

木葉紛紛亂打窗淒風淒雨暗空江世間甲子今為晉

戶裏庚申不到龐此膝豈因兒輩屈壯心寧受酒杯降  
與君相見頭俱白莫惜清談對夜缸

和繆叔正韻

白雲開處見山稜我欲躋攀力未勝歲晚不為干祿士  
前身應是小垂僧竹林載酒邀山簡草閣裁詩愧薛能  
結習未除閒未盡焚香且對佛前燈

和柑字韻

一飲酒辭十日酣濁醪到手味偏甘新詩漫賦宮槐陌

好事爭傳海岳菴霜後兩螯看紫蟹樽前一味出黃柑  
料應堂北梅花樹今歲開時只向南

和馬孟昭韻

淒風何處起擊柝報嚴更共此可憐夜相看太瘦生燈  
挑簷雨落茶煮石泉鳴猶有彌明叟聯詩慰逸

一作情最薄

呈繆叔正

百里扁舟能作客入門欸語似無依阿翁九月新成服  
老父三冬未見歸江上黑風兼雨至樹頭紅葉帶霜飛

傷心我亦如君切有子天涯未授衣

碧梧翠竹堂以暗水流花徑春星帶草堂分韻得星

字

附延陵吳克恭寅夫序云己丑之歲六月祖暑余問津桃源溯流玉山之下玉山主人館

余以草堂芝雲之間日飲無不佳適有客自郡城至者移于碧梧翠之陰蓋堂構之清美玉山之最佳處也集者會稽外史于立吳龍門僧琦陽醫劉起吳郡張雲畫史從序後至之客則聊城高晉吳興郊詔玉山主人及其子衡暨余凡十人以杜甫氏暗水流花徑春星帶草堂之韻分闋各詠言紀實不能詩者罰酒二兕觥罰者二人明日其一人逸去雖敗乃公事亦蘭亭之遺意也從序以畫事免詩而為圖時炎雨既霽涼陰如秋翠姬小瑞其翠屏素真三人侍坐與

立趨飲俱雅音是集也人不知暑坐無雜言信  
曰雅哉余延陵具克恭玉山人名瑛日二十有  
八

高堂梧與竹  
霰霰排空青  
涼飈忽飛來  
落我生色屏  
為君燕坐列  
綺席吳歌趙  
舞雙娉婷尊  
香翠縷雪齒  
蕉漿玉盃冰  
泠泠人生良  
會不可遇況  
復聚散如浮  
萍分明感此  
眼前事鬢邊  
白髮皆星星  
華亭夜鶴怨  
明月何如荷  
鍤隨劉伶中  
山有酒十日  
醉汨羅羈人  
千古醒蒲萄  
酒玻璃瓶可  
以駐君之色  
延君齡脫吾  
帽忘吾形美

人聽我重丁寧更借白玉手進酒且莫停酒中之趣通  
仙靈玉笙吹月聲泠泠與爾同躍雙鳳翎

以滿城風雨近重陽分韻得滿字

附番陽蕭景微序云至正辛卯

余自句吳還會稽飲酒玉山而別當是時已有  
行路難行之嘆繼而荆蠻淮夷山戎海寇警噤  
並起赤白囊旁午道路驅馳鋒鏑間又復相見  
因相與道寒溫慰勞良苦玉山為設饌高會梧  
竹堂上在座皆俊彥能文章歌舞盡妙選客有  
置酒而嘆者余笑曰子何為是拘拘也夫天下  
之理未有往而不復棄之久不用者夫國家至  
隆極治幾及百年當聖明之世而不靖于四方  
或者天將以武德訓定禍亂大啟有元無疆之  
休諸君有文武才將乘風雲之會依日月之光



止有日余也尚拭目以觀太平之盛何暇作愁  
嘆語邪王山揚解而起曰子誠知言哉于是飲  
酒樂甚明當重九遂以滿城風雨近重陽為  
副分賦如左壬辰九月八日番陽蕭景微飲

西風吹長江舟楫幾欲斷仙人遠方來羽服自蕭散頗  
言官軍中殺賊盡左袒時艱會面難取醉那容緩菊開  
重陽華對酒莫辭滿賡歌雜絲竹言笑亦侃侃月明梧  
竹間夜色良可款

湖光山色樓口占四首

并序

至正十年五月十八日余與延陵吳水西龍門

僧元璞匡山于外史避暑于樓中時輕雲過雨  
霽光如秋各占四絕句云

天晴吹雨過湖去溪水流雲出樹間樓上幽人不知暑  
鉤簾把酒看虞山

晴山遠樹青如薦野水新秧綠似苔落日湖光三萬頃  
盡隨飛鳥帶將迴

雨隨牛跡坡坡綠雲轉山腰樹樹齊江閣晚添涼似洗  
隔林時有野鶯啼

紫茸香浮簷蔔樹金莖露滴芭蕉花幽人倚樹看過雨  
山童隔竹煮新茶

以危樓高百尺分韻得危字

并序

七月初五日余會于匡山琦龍門于樓上輕  
風吹衣爽氣浮動纖月既出乃移樽樓外閣橋  
團飲時瑤笙與琴聲歌聲齊發泠泠天表如霓  
裳羽衣落我清夢遂各賦詩以紀

樓上笙歌合奏時湖山當席最相宜風吹輕袂身疑舉

人立飛橋意不危  
蜃氣欲浮河漢動  
秋光已近女牛期  
潘郎容易頭如雪  
且醉花前雙玉卮

以凍合玉樓寒起粟分韻得凍字

附于彥成序云至正十年冬溫

如春民為來歲癘疹憂嘉平之望凝雲畫合風  
格格作老泉聲雨霰交下頃刻積雪徧林野適  
郊雲臺自吳門張雲槎自茂苑吳國良自義興  
不期而集相與痛飲湖光山色樓上以凍合玉  
樓寒起粟分韻賦詩國良以吹簫陳惟允以彈  
琴趙善長以畫序首各免詩張雲槎興盡而返  
時詩不成者命佐酒女奴小瑤池小蟠桃金  
縷衣各罰酒二觥余乃于立得樓字賦詩于後

積雪未消春意動  
千里登臨游目縱  
月明初度影娥池

曙色稍侵鳴玉洞佳人象管怯初寒銀瓶梅萼猶含凍  
白髮休嫌舞袖長張燈夜促飛觴送

以吳東山水分題得陽山

附闕

序云界

光山色蕭爽夷曠殊快人意憑高一覽吳東山水盡在几席下余與諸文彥因得以適洞心駭目之觀遂即席用山水命題各賦詩以紀其事時五月端陽前一日也

別起高樓臨碧溪繞樓青山雲約齊陽山獨出衆山上  
却立陽湖西復西天風吹山岫不起倒落芙蓉明鏡裏  
影娥池上曲闌干徧倚秋光三百里白雲不化五彩虹

化為天矯之白龍一朝挾子上天去霈澤下土昭神功  
土人結祠倚靈洞雨氣腥翻海波動紙錢窸窣蜥蜴飛  
女巫擊鼓歌迎送茲山本是秦餘杭越兵晝獲夫差王  
不知誰是公孫聖空谷蒼聲吳乃亡只今此地愁雲黑  
鐵馬將軍金作勒漢蛇曷一作不識劒雌雄秦鹿應迷路  
南北山下開花一色紅花下千頭鹿養茸銜花日獻黃  
面老挾羣時入青蓮宮聞道青霜落林谷斤斧丁丁驚  
鳥宿千年白鶴忽飛歸失却長松舊時綠君今坐看樓

上頭析韻賦詩浮玉舟憑高一覽青未了底事仲宣生  
遠愁明朝更踏東山路傀儡湖中觀競渡酒花艷艷泛  
昌陽醉歸扶上樓頭去

柳塘春口占四首

附于彥成序云至正十二年正月下嶺春雪方霽飲酒柳塘上

水光與春色相盪因詠王臨川鴨綠鵝黃之句  
各口占四絕以紀時序嗟乎世故之艱難人事  
之不齊得一適之樂如此者可不載諸翰墨以  
識當時之所寓況南北東西理無定止焉知後  
之會者誰歟席上賦詩者三人主則玉山  
顧君客子英表君余臣廬于立彥成也

二月看看已過半春風尚爾不放晴楊柳長堤飛鳥過

鷓鴣新水沒灘平

溪上草亭絕低小春來有客日相過便須對柳開春酒

坐看晴色上新鷺

鳥啼殘雨過

一作過

平皋魚逐輕波趁小舫獨愛大堤楊

柳樹又牽春意

一作色

上柔條

小亭結在灤西頭沉復春半雨初收柳垂新綠枝枝弱  
水轉回塘漫漫流

以柳塘春水漫分韻得柳字

并序



余去春避地于吳興之商溪始識天民于溪上  
之大慈隱寺天民讀書尚節義落落有古人風  
故與余甚浹洽及余之歸遠餞于洪城溪亭臨  
溪泣別則其交情可見矣今又能駕輕舟歷數  
百里之險途來問訊余之祝髮其義之篤情之  
深非尋常泛交結面者之比也余敬借此詩美  
之且以餞其歸以簡無隱老禪求一轉語也

剥啄誰扣門乃是忘年友遠從商溪來過我繩樞牖入

門無一言但覺驚我醜我醜我自知削髮事三有學佛  
亦何補用以脫塵垢全我濁世身薦我生身母羨君顏  
色好濯濯春月柳不為時所趨甘著儒冠守即今一相  
見意思兩彌厚春風吹楊花落我杯中酒願持滿滿杯  
再起為君壽君其勿我辭罄此埽愁帚不聞亂軍中食  
人如食狗苗獠虐已甚橫殺掠人婦自古戎旅間此事  
十八九若以樂土言無出平湖右未知干戈世能免餓  
莩否忍君遽云別更欲周旋久橫塘新水發舟楫不肯

後君今必欲歸為語無隱叟願施七寶牀大作獅子吼

漁莊以解釣鱸魚有幾人平聲字分韻得人字

于附

彥成序云至正庚寅七月十一日飲酒漁莊上時而初過芙蓉始著數花翳翠飛闌檻間漁童舉網得二尺鱸于是相與樂甚主人分韻賦詩主則玉山隱君客則琦龍門于匡廬行酒者小璚璣余則于彥成弁其首簡

芙蓉始花秋水新小莊落日酒相親  
漁童樵青解歌舞  
茶竈筆牀隨主賓  
龍門山人碧玉塵  
會稽外史白綸巾  
蓴羹鱸膾我所愛  
吟對西風懷遠人

欸歌二首

附河南陸仁良貴序云至正辛卯秋九月十四日玉山讌客于漁莊之上芙蓉

如城水禽交飛臨流展席俯見游鯉日既夕矣  
天宇微肅月色與水光蕩搖樞檻間遐情逸思  
使人浩然有凌雲之想玉山俾侍姬小璫英調  
鳴箏飛觴傳令歡飲盡酣玉山口占二絕命生  
客屬賦之賦成令漁童樵青垂小榜倚歌于蒼  
茫煙浦中韻度清暢音節婉麗則知三湘五湖  
蕭條寂莫耶得有此樂也賦得二十  
章名曰漁莊欸歌云河南陸仁序

返照移晴入綺窗  
芙蓉楊柳滿秋江  
漁童欸乃

一作樵青蕩

舟去驚起錦鳬飛一隻

金杯素手玉嬋娟  
照見青天月子圓  
錦箏彈盡鴛鴦曲

都在秋風十四絃

金粟影以荷淨納涼時分韻得涼字

附于彥成序  
云夜坐金粟

池上涼雨初過荷氣浮動秋思翛然各  
分韻口占成詩以紀事時七月十日也

翠沼新秋浴夜光畫閣古

一作芳

樹發天香西風陳陳廉

纖雨荷葉荷花不奈涼

書畫舫和鐵崖韻

玉山主人引婁水其居之西鑿  
為桃花溪厠水之亭四楹上蓬

下板傍樞翼然似艇窗其沈影與波動若有纜  
而走者揚塵夫嘗吹鐵笛其中客和小海歌不  
異扣舷者之為中無他長物唯琴瑟筆硯多者  
書與畫耳遂以米芾氏所名書畫舫命之云

春水畫船如屋裏船頭吹簫隔花聞并刀落手碎玉斗

柳蜜分香屬紫雲上客日傳金帖子美人夜織錦迴文

高堂醉卧氍毹月肯信東家帳有蚊

玉山主人與楊鐵崖飲于書畫舫待

姬素雲行柳子酒相與聯句畢鐵崖乘興奏鐵龍之笛復命素雲行柳子酒玉山口占云鐵笛一聲停素雲鐵崖擊節遂足成一詩俾玉山次韻并錄于此黃公壚西達故人生客各以能詩聞柳漿半斗破明月鐵笛一聲停素雲前紙題詩寫章草爪皮看鼎辨周文人生嘉會不有述何異市中羣聚妓時至正八年上巳日也

以春水船如天上坐老年花似霧中看平聲字分韻

得如字

附鄭明德序云久以物景艱棘不到界溪溪之上顧君仲瑛甫讀書績學尊賢

好士當太平之時無事不過從也睽違幾年  
近以嘉平之三日扣君之扉荷君留連不忍言  
別已而河東李君廷璧甫亦挈舟來訪遂置酒  
書畫舫夜參半酒已酣折杜律句春水船如天  
上坐老年花似霧中看平聲字為韻  
人各賦詩而俾遂昌鄭元佑為序

為人性癖愛幽居結得幽居畫舫如沙嘴曉風開慢入  
簷牙晴日落窗虛厨空尚有仙家一作人酒歲晏能來長

者車汊澗綆寒因煮茗鑿冰船發為叉魚米顛癡絕尤  
耽畫鄭老窮愁却著書爐篆寶香薰篤耨硯泓春水滴  
蟾蜍紙浮玉色供臨榻月吐虹光照卷舒許結老年三

絕社須君好事寫歸歟

餞謝子蘭分韻詩

并序

至正戊戌秋九月毘陵謝君子蘭過玉山中謂予言  
曰僕旅寓合塘之上今年夏秋苦霖雨田皆白波與  
陂湖相通所居復卑下老妻稚子不遑寧處兼乏樵  
蘇之所今于泗川里得屋一區主于友人管伯齡其  
里亢爽宜禾麥予乃攜硯田而就耕焉故來言別予  
遂置酒于書畫舫邀恢公復初袁君子英陸君元祥



朱君伯盛以江東日暮雲分韻同餞余得東字  
子蘭得江字亦賦詩留別餘字各有所屬云

先生祖實康樂公于今為庶稱老翁  
派流白鶴溪上住鄉里羣豪趨下風  
叩門過我驚我儂一作東頭戴笠子心

忡忡談空說有丘壑志抗塵走俗山澤容  
自言千里竄荆棘此身飄泊如飛蓬  
山妻未老髮半一作已禿紉鍼主

饋全婦功大兒學詩次學禮小兒五尺儒  
門童前年去年兵蔽野單堠雙堠人舉烽  
孤舟如葉載雨雪朝浮暮

泛西復東寒蠅穴窗死錯紙泥龜曳尾生脫筒只今儼  
屋在美里黍穗雨黑波搖空米如買珠薪束桂壞壁四  
立鳴哀蛩杜陵遷居憂國難阮籍命駕嗟途窮鷓鴣無  
枝何所寄烏鵲三帟將奚從結心泗川得管子為借一  
畝幽人宮我為斯文雅識面遲遲細語傾深衷我開船  
屋秋水中綠波碧樹紅芙蓉推窗面面遠山入引鉤箇  
箇游魚逢好事獨許米老得清賞當與岑參同畫張神  
筆駭瘡鬼書著芸香辟蠹蟲槽頭夜滴百斛酒佳菊爛

發花叢叢蟹斫兩螯白雪滿摘摘並蒂黃金重薦君之  
酒餞君別莫辭大酌玻璃鍾君不見繞屋水流流入松  
五湖四海三江通君歸只在泗川上百里那消風一蓬  
君好去莫怱怱足衣足食可御冬回首虹光貫明月新  
詩多附高飛鴻

和岳季堅韻

附義興岳榆季堅序云至正戊戌四月余自虎林抵吳城遂挈舟造玉山

草堂以慰契闊留五日余不別而往與王叔明  
張禹錫同寓山寺泰來峯樓居玉山主人與袁  
子英適與相遇同飲清真觀竹池西軒玉山謂  
兵甲蜩集朋友星散會合誠難期再過草堂少

為行樂而科役遽興愁嘆百出叔明亦謂艱難之際交游之情正宜相勞玉山別後二日即同載如約玉山置酒梧竹間飲散于芝雲堂前復坐池上書畫舫中翫月啜茶同集者袁子英盧公武范君本余念出處塞屯離合不偶援筆賦詩以簡同志并賦云

梧桐葉大午陰垂展席臨風晚更宜客自遠方來不易

月從大

一作滄

海上應遲王猷愛竹非無宅山簡觀魚別

有池洗觥政當傾契闊臨行毋惜重題詩

春暉樓以攀桂仰天高分韻得高字

附豫章熊自得夢祥序云

至正壬辰七月二十六日余自淮楚來于時道途梗阻雖近郡不相往來獨余以六月達吳凡

相知者莫不驚訝余之迂而投也越數日即謁  
玉山主人于草堂中而匡廬山人在焉相與議  
論時務凡可驚可愕可憂可慮者不少余乃曰  
于斯時也弛張繫乎理不繫乎時升降在乎人  
不在乎位其所謂得失安危又何足滯礙於東  
邪玉山主人方執玉麈長嘯意氣自如時適當  
中秋之夕天宇清霽月色滿池樓臺花木隱映  
高下是猶天中之畫畫中之天乃張筵設席女  
樂雜沓縱酒盡歡同飲者匡廬仙于立彥成衣  
華子英張守中大本玉山復擘古阮與胡琴儕  
絲竹并歌聲相為表裏釐然有雅之意余亦以  
玉簫和之酒既醉玉山乃以攀桂仰天高為韻  
分闋賦詩詩成者興趣橫生模寫風景殆無不  
備復畫為圖所賦詩于上亦足以紀一時之勝  
嗚呼于是時能以詩酒為樂傲睨物表者幾人  
能不以汲汲皇皇于世故者又幾人觀是圖讀

是詩者寧無感乎余則引  
其首乃豫章熊夢祥也

朱樓隔水度飛橋  
翫月張筵快酒豪  
同向鏡中看玉兔  
恰如海上踏金鼇  
影搖大地山河動  
光射玄洲殿宇高  
明  
日中秋湖上去更攜紅袖泛輕舸

以紅藥當堦翻分韻得翻字

附岳季堅序云至正  
庚子孟夏黃鶴山人

岳榆與相臺翟君文中自兵城挈舟至海虞復  
過崑山訪顧君仲瑛草堂值春暉樓前芍藥盛  
開仲瑛重置酒樓上是日雷雨新霽風日淡蕩  
趙善長折金帶圍一朶插瓶中及以紅白花擎  
統攢簇朱伯威督行酒全集者七人天基道士  
于方外暨伯威善長先醉仲瑛謂人事惟艱天

時自適友朋盍簪寧無一語以紀其行樂乎遂以紅藥當階翻一句分韻賦詩者文中仲瑛子英并榆得藥字詩成為序  
其首實四月十一日也

靈雨沐霽景初暎散朝暄林鴛咲餘春砌藥開當軒  
汝妝露泥泥舞袂風翻翻流光不我邁久懷遲君論于以  
樂樽壘于焉傾笑言

秋華亭以天上秋期近分韻得秋字

附于彥成序云至正十年

七月六日玉山主人置酒小東山秋華亭上歌舞少間羣姬狎坐庭中時夜將半秋聲露氣在竹榻間曲水縈帶山石下與銀漢同流  
脩然若非人間世因分題賦韻如左

開宴秋華亭子上共看織女會牽牛星槎有路連雲渡

銀

一作河

漢無聲帶月流取醉不辭良夜飲追歡猶似少

年遊分曹賭酒詩為令狎坐猜花手作闌最愛柳腰和

影瘦更聽鶯舌弄春柔金莖露落仙人掌錦瑟聲傳帝

子愁絡緯豈知都是怨芙蓉莫恨不禁秋碧空珠斗

一作

紫微花下

微風動重欲移樽為客留

七月九日復飲秋華亭上天香襲人幽花倚石時

猩紅軋琴寶箏合曲瓊花起舞蘭陵美人度觴



與琦龍門行酒余為作詩以紀良會就邀匡山

龍門同韻

又到秋華亭子上東山秋

一作爽

氣正清妍僧

一作堦

前落

葉不須埽石上幽花自可憐越國女兒嬌娜蘭陵酒

色淨娟娟深樽賸

一作盛

有清香在留待瑤笙月下傳

春草池綠波亭以銀漢無聲轉玉盤分韻得聲字

附吳興沈明遠自誠序云玉山顧君仲瑛樂游  
好奇聞吳興山水清遠嘗放舟過余水竹居每  
與登何山泛玉湖輒盡興而返問于余曰子安  
知吾鄉玉山月色日接于心目固可樂也抑豈

若余來游觀之為樂與今年莫春余過吳舍于流水寺仲瑛聞余之至遂入城府相見劇談數日而去秋八月十有四日仲瑛復以書致余曰當秋高氣爽玉山中能來一游乎及余來時龍門琦元璞開士先至數日已遂握手入西園歷覽清勝是夜月魄既滿凉空一碧天香水影交映上下殆非人間世仲瑛乃張樂置酒于湖山樓酒半移席綠波池上同席者會稽王德輔從子倫仲瑛之季晉道仲瑛命小孺華調箏南枝秀倚曲舉杯屬客曰人生會合不可常今夕之飲可不盡歡邪去年茲集如山陰道士于彥成輩今皆在天外雖欲同此樂邈不可得乃以銀漢無聲轉玉盤分韻賦詩元璞得銀字德輔得漢字仲瑛得聲字余得無字詩不成者罰酒一觥明日詩成登卷俾余為小引云余則吳興沈明遠自誠也時則至正辛卯中秋既生魄

據牀坐看月華生

一作明

水氣浮空夜氣清  
蜃闕珠宮寒

作市銀盤玉露靜  
無聲芳筵累吸杯中物  
彩鳳雙吹樹底笙  
不見山陰狂道士  
相思只在越王城

次琦元璞韻

附元璞序云去年春余與玉山主者避難于雪上家之舊藏書畫多失去

今年二月余自松陵放舟過玉山中時芙蓉渚之軒新城主人與余登眺其上洗人心目不覺神情暢然與去年難中不同也及觀所補詩卷因漫繫云

去歲一春同作客  
今春相見却

一作各

身閒亭開翠柳紅

桃外魚躍綠波春  
草間自笑淵明居栗里也  
隨惠遠入

廬山何當共下吳江釣坐向船頭語八還

時余舍俗元璞住吳江之

無礙寺故云

夜坐口占

虛亭月色不勝寒  
沉坐綠波亭上看啼斷候蛩秋寂寂

好懷正在曲

一作倚

闌干

絳雪亭秋日海棠花

并序

得商鼎靈石者數輩日相賞玩以遣世慮一日同觀

此花于脫葉間露紅蓓蕾于炎風赫日中甚可驚訝

後三日而花大拆

一作放

乃延汝陽宮城二公魚鼈斫

鱔嘗新筍蓮花白酒與花神洗妝少焉清風南來明

月東上頓思匡山寓于越香山阻于杭龍門歸吳江

而無信道路梗絕莫知何在余子元臣孤身守忠存

沒未保向之看花觴咏者惟汝陽一人而已對花傷

感

一作衷

漸成不樂而罷酒越五日而河南陸仁良貴

太原王楷叔正同舟泊溪上是晚鬱蒸尤甚而此花

尚留數十朵在亟命書童張席露坐樹傍相與折花

劇飲各詠言之嗚呼花不以寒暑而間人乃有吳越  
之阻世殊事異能不慨然余向時絳雪亭詩卷兵至  
時為好事者持去就俾莒城貌圖于前余賦唐律一  
首于後請坐客相次以紀時丙申七月二十八日也

怪底海棠能狡獪今年當暑著花鮮露黏蝶粉生珠一作

朱汗日炙猩紅上紫綿夢斷馬嵬一作鬼坡春信遠神遊金

谷晚妝妍獨憐向歲題詩者不見燒燈花樹前

聽雪齋以夜色飛花合春聲度竹深分韻得聲字

附西夏昂吉起文序云至正九年冬泛舟界溪  
上訪玉山主人時積雪在樹凍光著戶牖間主  
人植酒宴客于聽雪齋中命二娃唱歌行酒雪  
霰復作夜氣襲人客有岸巾起舞唱青天歌如  
怒雷于是衆客樂甚飲遂大醉匡廬道士誠童  
子取雪水煮茶主人具紙筆以齋中春題分韻  
賦詩者十人俾書成卷各列姓名于左  
是會十有二月望日也西夏昂吉書

虛館畫生白飛花照眼明隔簾時有影著地靜無聲夾  
坐人如玉深杯酒屢傾清歡竟成醉淡月破雲生

白雲海銘辭

鄭元祐記云丙申春界溪顧仲瑛奉  
其母陶夫人避兵于商溪在吳興東

南僻處以君平昔尊賢下士褻糲具舟相從于  
溪上者不絕夫人甘脆之味溫清之奉一切如

家庭居無何病氣決而卒奉玉骨歸葬綽墩之  
先隴仲琪念母不見結樓于碧梧翠竹之堂後  
名之曰白雲海新朝聞君才名將授以祿秩君  
以衰絰固辭祝駿家居日誦大業經以薦母

虞山幾千疊千疊白雲飛出山變蒼狗入山為白衣不  
如化作雙白鶴飛向白雲深處落向余能解說前身不  
是當初舊城郭

次文質韻

白雲深白雲深白雲飛來知我心笑看觸石起膚寸斯  
須變作漫天陰山人驅雲飛出牖一道龍光射南斗大



星落落小星明萬物區區等芻狗舉手招歸懷抱裏三  
日顛風吹不起怒排雨脚走空來卷入銀河一泓水四  
野紛紛未倒戈其奈山人不出何有時乘雲釣東海世  
上空尋張志和萬松嶺上雲如紫天賜山人作霖一作東  
注明朝說與雲中君白雲之樓是常住

再疊前韻

白雲深白雲深高樓結在雲中心樓中之人白雲友日  
日醉臥梨花陰大笑白衣對戶牖肘後黃金大于斗草

間逐兔縱得之九鼎熱油烹走狗爭如高臥高樓裏未

一作不

聽催歸聽喚起釣竿不釣北溟魚酒杯倒吸西江

水何須逐日怒揮戈其若花開雪落何空將朽索馭快  
馬箭雲放轡追羲和樓外晴雲擘飛絮手拍闌干目如  
注青山排闥四海來面面青山白雲住

三疊前韻

君不見白雲在山如海深世人不解白雲心不從神龍  
降甘澤肯從靈女為朝陰又不見白雲出山飛入牖維

南有箕北有斗世人再拜仰天光多挽長弓射天狗月  
明照見玉山裏不受輕風易吹起宵深飛度影娥池影  
在青天天在水樓下雞鳴夜枕戈樓頭開一作宴招李  
何雲車逕逕衆仙下玉笙瑤管聲相和翦雪作花雲作  
絮浪浪酒瀉龍頭注就中誰起壽主人倒喝飛光酒中  
住

四疊前韻

玉山盤盤窈且深中有樓兮居山心白雲不斷護巖壑

下與梧竹連秋陰天風吹雲夜開牖城上烏啼擊刁斗  
芒碭長途斷白蛇上蔡東門嘆黃狗主人醉坐闌干裏  
雲影時看一作時酒中起賞春不折背巖花烹茶自汲當  
門水戰國紛紛競挽戈縱橫辯口誇隋何黃鐘不作大  
雅調五絃漫爾張雲和君不見水上浮萍元柳絮也趁  
桃花流水注不似白雲日日閒只伴幽人在山住

來龜軒

并序

余自吳興避難浮家而歸玉山佳處無一毫之失

忽于西廡空庭中有神龜大將尺餘四牆無隙不  
知所來乃添一小軒扁曰來龜以符龜來之兆及  
有舊犬聞嚙軍士之右足環柱不能脫衆槍將及  
始去匿于田坂中不能得之余因呼之為阿義陸  
君良貴有義犬行因紀龜之靈故及犬之義也  
避亂歸來兩鬢霜春風依舊滿門牆喜看義犬眠花塢  
驚見靈龜踞石牀曳尾泥塗來遠道負書蓮葉出重光  
慎須勿落元君夢自笑

一作有笑

能知五世昌

拜石壇

玉山主人嘗于東城巷假山廢基得一石上有蘇子瞻題識石理瑩潤類鉞雖左旁

缺損然尚奇甚博士柯敬仲見而奇之再拜題名而去字曰拜石御史白野達燕善為作古篆書之後玉山主人偶得于贍荅維揚王忠玉提刑飲快哉亭帖與石上題識相合玉山主人謂此石即忠玉家快哉亭物也時不知何以至此玉山主人遂為記其事倩朱伯威刻之他石而與河南陸仁汝南袁華各為詩詠之

好事久傷無米顛清泉白石亦淒然快哉亭下坡仙友  
拜到丹丘三百年

送周仕宣南臺典史分題得芙蓉堂

芙蓉並開開滿堂堂中美人傾玉觴  
畫船鼓吹弄白日迴風驚起雙鴛鴦  
鴛鴦雙飛出城去池上開花知幾度  
不聞嬌燕語雕梁惟有棲鳥啼  
碧樹空城夜夜月光照見烏臺臺  
上霜翠幙芙蓉大如斗盈盈綠水明  
新妝鍾山蜿蜒若龍走走子春江一  
壺酒他時戴花歸故鄉莫忘江頭折  
楊柳

送鄭同夫歸豫章分題得洞庭湖

五湖秋水洞庭煙七十二峯青插天  
神禹書藏林屋裏

仙人詩刻石屏前溫溫玉氣穿靈洞白白銀河瀉瀑泉  
鴻鴈來時木葉下送君晨發楚江船

雪霽與郊九成陳惟允坐劔池上惟允為寫圖因

次九成韻

飲澗長虹挂深嶺千尺轆轤斷修

一作縣斷

綆夜寒月黑鬼

賦詩白日清風

一作日白風清

人寫影藤蘿陰陰蔓

一作蔓陰

山

椒長松落雪如花飄煩君畫我掩書卧窗前更著青芭

蕉



游天池

縈紆白雲路窈窕青山聯秋風吹客衣逸興良翩翩捫  
蘿度絕壁躡磴窮層巔崖傾石欲落樹斷雲復連兩峯  
齟牙門中谷何廓然大山屹堂堂直欲摩青天小山亦  
磊落飛來墮其前陰陰積古鐵粲粲開青蓮神斧削翠  
骨天治涵靈泉玉龍抱寒鏡倒影清秋縣憶昔張貞居  
守我琳琅篇逝者不可作新詩徒為傳舉酒酹白日萬  
壑生淒煙幽歡苦未足落景忽已遷美人胡不來山水

空清妍

響屧廊

日日深宮醉不醒  
美人嬌步踏花行  
鐫鏤賜與忠臣後  
葉落君王夢亦驚

西湖口占三首

湖山堂上看荷花  
亂舞紅妝萬髻丫  
細雨霑衣涼似水

畫船五月客思家

右觀荷  
值雨

薄薄紅綃映雪膚  
玉纖時把髻鬟梳  
風流得似貞期子

添箇芭蕉畫作圖

右題叔厚畫  
素雲小像

十九韋娘著絳紗金杯玉手載春霞清歌未了船頭去

笑買新妝茉莉花

右戲贈  
杜姬

泊垂虹橋口占二首

三江之水太湖東激浪輕舟疾若風白鳥羣飛煙樹末  
青山都在雪花中

江風吹颿倏數里野花笑人應獨行更須對雪開金餞  
要聽鄰船搗玉箏

發齊門

東方晨星如月明舟人捩舵聽雞鳴  
自憐不合輕為客  
莫厭秋風攪樹聲

泊閶門

楓葉蘆花暗畫船銀箏斷絕十三絃  
西風只在寒山寺  
長送鐘聲攪客眠

發閶門

閶門西去是陽關疊疊秋風疊疊山  
便是早春相別處

如今楊柳不堪攀

今春送于外史歸越上

### 晚泊新安有懷九成

夜泊新安驛西風八月天  
人家溪樹裏晚飯柁樓前  
水落星移石雲開月墮船  
遙思佩韋者癡坐不成眠

### 舟中作

自愛玉山書畫船西風百丈大江牽  
出門已是三十日到家恰過重九天  
青山白水與君賞翠竹碧梧惟我憐  
近聞海上鯨波靜爛醉草堂松菊前

次周履道韻

夜泊石湖湖水傍芙蓉露白蕪葭蒼畫船酒行飛急觴  
美人羅袖隨風揚長檠翠幙高高張浩歌起坐秋夜涼  
明月已在天中央大星小星光煜煌酒酣不記過船去  
但聽秋聲響疎雨夢中花作蝴蝶飛飛入花間聽春語  
鄰雞喔喔東方曙船尾浪花風起舞為君起和夢中詩  
水氣如煙度秋渚

次龍門琦公見寄韻二首

扁舟遠適越溪濱  
雙槳驚飛白鷺羣  
要趁秋江三尺水  
去看山寺九峯雲  
西風網罟沿村集  
落日鐘聲隔水聞  
好對黃花同一醉  
故園晴色晚如熏

秋花楓葉暗江濱  
萬里西風鴈叫羣  
漫是羈情濃似酒  
獨憐世事薄于雲  
九龍山色船頭看  
半夜鐘聲枕上聞  
料得高僧禪定處  
松窗柏子起濃熏

九月七日復游寒泉登南峯有懷龍門雲臺二首  
春遊憶得到寒泉  
正值鶯花過禁煙  
楊柳樓中金錯落

琵琶船裏玉嬋娟潘郎別去渾多病道士重來是有緣  
今日登高能作賦雲臺不見使人憐

又向江頭載夕暉好懷每與世相違客中重九明朝是  
眼底故人今日稀過雨黃花千藥發經霜紫蟹兩螯肥  
秋江更待澄如練擊楫中流緩緩歸

可詩齋夜集聯句

附淮海秦約文仲序云至正十  
四年冬十二月二十二日余游

吳中屬時寇攘相君有南征之命川涂修阻舟  
楫艱難遂假館于仲瑛顧君之草堂而雪霰交  
作寒氣薄人翌日夜分集于可詩齋客有匡廬  
于彥成汝陽素子英吳郡張大本相與笑談樽



組情誼淡洽酒半諸君咸曰今四郊多壘膺厚  
祿者則當奮身報效吾輩無與于世得從丈酒  
之樂豈非幸哉然友朋難必每思草堂一時諸  
公出處俱異時鄭君九成則執筆漕臺陸君良  
貴亦有漕事之冗惟龍門琦公元璞獨占林泉  
之勝以自適其性情興言若人又不能不予斯  
集馳企也因效石鼎故事以紀是集凡若干韻  
詩成夜漏下三鼓矣序其首者淮海秦約文仲  
也

今夕乃何夕歲律已云莫更長燈燭明

顧瑛

夜冷冰雪沍

滕六巧薦瑞

于立

封姨怒相妬簪盞各盡歡

秦約

杯行不知

數肉臺春筍纖

袁華

法曲冰絃度紅淚泣風蠟

張守中

翠煙

積春霧鼎沸雀舌烹

顧璣

酒瀉龍頭注呶嚶轉鶯喉

于立

蹠

跚躅驚步燕譙落語穿

秦約

驅馳慨行路計窮首授首

秦華

車墜費誅屨風塵闍城郭

張守中

稼穡場圃憂傾漆室

葵

顧璣

啖分嬾殘芋天王狩河陽

秦約

奸臣拒官渡濟時風

雲會

于立

曠世龍虎遇前席宣室徵

秦華

下詔輪臺布凱奏

扶杜詩

張守中

諫諷校獵賦干羽舞兩階

顧璣

歌謠誇五袴

時清仰皇澤

秦約

會少憶良晤春冰破微甲

于立

夜月照寒

素雲間鶴鳴陸

秦華

吳下書惟顧瘦袁驕似戟

張守中

短于

腹如瓠張也鄉曲英

顧璣

秦亦廊廟具孔問郊子官

于立

杜

賞已公句睽違念契闊

秦約

茗予寫情愔冉冉嘆駒馳

袁華

營營笑蚊聚浮生草棲塵

張守中

虛名日晞露嗟彼噂沓

徒

顧璣

有此和樂孺用繼石鼎聯聊以識所寓

秦約

### 與繆叔正聯句

短檠二尺照清酣

顧璣

圓餅裁肪韭味甘

繆侃

舊雨今為紅

葉雨

顧璣

閒雲不障白雲菴

繆侃

范君遠餽吳犍肉

顧璣

錢老

能分林屋柑

繆侃

今夕共謀真率醉

顧璣

莫將時事說江南

侃 繆

湖光山色樓聯句

附于彥成序云七月十五元璞泛舟下婁江余與高起文先生

玉山隱君坐湖山樓上帳然有裏即所見聯句成律

樓倚清秋爽氣高

高起文

眼明百里見纖毫風行綠野翻

清浪

于立

雨到青林起暮濤幾樹好花開別岸

顧瑛

一隻飛

鳥趁輕舸龍門今日婁江去

高起文

會有新詩寄我曹

于立

沈華館聯句

附會稽楊維禎廡夫序云至正戊子六月二十四日維禎與衛輝高智匡

廬于立清河張師賢汝南袁華河南陸仁謙集于沈花館酒闌主客聯句凡二十四韻主為玉

山顧瑛客與聯者維楨立師賢

華仁也會稽楊維楨引其首

大廈千萬餘小第亦云甲馬山分玉崑

維楨

鮑津類清雪

湖吞傀儡深

立

江瀉吳淞狹地形九曲轉

師賢

峯影千丈

插斜川萬桃蒸

華

小徑五柳夾仙仗撞石檢

仁

靈洞開

玉匣雲停清蔭初

瑛

涼過小雨霎鶴舞竹籬隄

維楨

魚亂

萍喋唳風顛帽屢欹

立

暑薄衣猶袷花憑嬴女獻

師賢

酒

倩吳姬壓簾卷蒼龍鬚

華

盤薦紫駝胛戎葵粲巧笑

仁

文瓜印微掐白鬢魚乍封

瑛

紅蓮米新畝急觴行蒲萄

維

清池扇蒲萋火珠梅爛熳立冰絲萼浹溼雲雷摩乳

彛

師

琤琤玩腰珎伶班鼓解穢華軍令酒行法弓彎舞

百盤

仁

鯨量杯干呷腔悲牙板擎瑛調促冰絃摩客歡

語導嚳

維

童酣鼻齁貽酒徹給泓穎立詩成繕書劄嘔

句投錦囊

師

披圖出綳笈驪駒歌已終華青蛾情尚狎

永矢交友盟

仁

銅盤不須歆

瑛

書畫舫聯句

三月三日

與楊鐵崖飲于書畫舫侍姬素雲行柳子酒遂成聯句如左

龍門上客下驄馬

瑛

洛浦佳人上水簾瑪瑙瓶中柳蜜

酒維赤瑛盤內水晶鹽晴雲帶雨沾香炷瑛涼吹飛花

脫帽簷寶帶圍腰星萬點維黃柑傳指玉雙尖平分好

句才無劣瑛百罰深杯令不厭書出撥燈侵繭帖維詩

成奪錦鬪香奩臂韝條脫初擎研瑛袍袖弓彎屢拂髯

期似梭星秋易隔維愁如錦水夜重添勸君更覆金蓮


掌瑛莫放春情似漆黏維

舟中與陳敬初聯句

行春橋下看山回瑛翠幙紅簾面面開基一夜水風吹

不斷立蜻蜓飛入畫船來

璚



元詩選初集卷六十四